



Betico, felizmente den compania di su esposa Glenda y su 4 yiunan, Junior, Glendeline, Guisette y Gemby.



Glenda y Betico a caba di vota.

BETICO, nos gran amigo

Betico, qui tristo nos a sinti nos mes ora cu e noticia malo a yega na nos orea. Mes ora mi a bay na cas di Mo-Fankico y Mimita pa averigua kico ta kico. Eynan Dick y su rumannan a participa mi cu ta berda: Betico a fallece.

Masque cu nos tur tabata pidi pa no ta berdad, poco poco nos tabata realisando e tristo y amargo berdad; Un yiu di tera noble y gran luchador a bay laga nos.

Betico: Mi tabata tin e honor di a conoce di hopi cerca. For di 1967 tempo cu Shon A Eman a acerque pa drenta den e cruel mundo di politica, mi a para cerca banda di dje. Den tur sentido di palabra mi tabata apoyé, como un

campanador, lider, votador y un fiel ayudante. No tabata tin cos grandi of chiquito pa mi por a yudé, y no ami so, pero hopi mas.

Pa Betico, nos semper tabata tin tempo, pasobra cu nos tabata aprecia, su manera, humano, y su manera di acerca hende. Un gran persona, humilde, Arubiano den tur su curazon; cu un stimacion grandi pa su patria.

E obra mas grandi cu el a logra tabata na e Conferencia di Mesa Rondo na 1983, tempo cu el a logra e STATUS APARTE, na caminda pa Independencia. Sin duda alguna, e ta e persona cu lo bay den historia cu a pone Aruba ariba e mapa inter-



Gemby, Guisette, Betico, Glendeline y Junior, y un amigo di cas.

GRATITUD

Den e simple poema aki graba
gratitud nos pueblo kier expresa
na e homber balente tenaz luchador
BETICO CROES Aruba su libertador

Añanan largo bo bida bo a sacrifica
bo juventud valioso bo a desperdicia
bo bida familiar bo a negligia
pa nos ideal por a ser realisa

Riba suelo di bo pueblo stima
sanger di e homber noble aki a derama
y den bo dolor y agonía a exclama:
sigui cu e lucha Aruba jamas lo doblega

Esaki ta palabranan di nos lider di balor
e Arubiano cu a lucha cu amor y sin temor
Betico bo lealtad y valentia a keda demostra
hasta na momento cu bo bida a termina

Bo esfuerzo y sacrificionan pa Aruba su libertad
ta obranan ehemplar pa henter nos comunidad
Aunke bo curpa ya sin bida un amargo realidad
BETICO bo nomber inmortal nos lo recorda te den eternidad

CHOMI LACLE



Betico, semper tabata stima mucha masha

Betico Maestro Di School



Sr. Betico Croes, como estudiante na Hulanda, a representa Aruba durante e bishita oficial di La Reina. Ariba e foto, full na man drechi, por mira un Betico Croes den pleno hubentud, y ya den pleno hubentud su yamado politico tabata evidente.



Foto demostrativo di tempo cu Betico Croes tabata Diputado di Enseñanza na Aruba. Aki por mire ta entrega trofeo na Colegio San Jose, Santa Cruz.



Sr. Betico Croes, como maestro di school, profesion cu el a siña pe, dunando les na MULO, San Antonius College na Santa Cruz.

Pedro Bislip di ADN:

UN GRAN POLITICO A BAY LAGA NOS

ORANJESTAD(AAN)— Un gran politico a bay laga nos. E promer palabranan di señor Pedro Bislip, kende ayeramainta na un forma hopi emocionada papia cu DIARIO y a muestra tambe cu pa hopi tempo el a traha hunto cu Betico Croes.

Señor Pedro Bislip a muestra cu den henter Pueblo a biba e speranza cu Betico Croes lo a regresa y cu e lo a bolbe pa duna su cooperacion na interes di su Pueblo.

Pero no por tabata asina, ya cu el a fayece.

Recordando tur e meritonan ariba tereno estatal y politico di Betico Croes, señor Bislip a bisa cu Betico Croes a biba cu Pueblo.

Ta esfuerzonan di Betico Croes a haci cu e deseo pa Status Aparte a worde rebiba y un anhelo realiza.

Bislip a lamenta cu awor cu Aruba a haya su Status Aparte, pa cual Betico Croes a bringa tanto, cu el a fayece.

"Ta di mas bisa cu el a traha pa Pueblo", Bislip a muestra, indicando cu tur hende ta na altura con Betico Croes a bringa pa Aruba.

Na e momentonan tan tristo, Pedro Bislip a expresa palabranan sincero di condolencia na familia di Betico Croes y tambe na MEP.

"Paz na su restonan", el a conclui.



Tico Kuiperi, Fifi Eman, Sarah Boelinger y Betico durante celebracion di Himno y Bandera.

Grace Bareño:

UN ENVOLVIMIENTO TOTAL CU PUEBLO

ORANJESTAD(AAN)— "E tabata sabi di traha tempo pa tur cos. Hasta e cosnan di mas chikito di mas insignificante". Grace Bareño, kende for di añl 1975 ta traha den fila di MEP, ta recorda Betico Croes, mientras e ta trata di realiza kico a pasa ayeramainta.

Tabata na año 1975, cu Bareño a drenta campo politico, ariba sugerencia di Betico Croes, kende a sabi di convence, ya cu na promer momento Bareño mes no tabata tin e inclinacion pa drenta politica.

Pero Betico Croes a mostre ariba e balor di hende muher y asina a convence pa e participa den politica.

Grace Bareño ta papia di e relacion balancea cu tabata existi cu e lider di partido. E tabata scucha y hopi biaha tabata discuti kico lo mester a pasa.

Betico Croes tabata tin timon den man di e partido cu mester a actua como

un union.

Aunke Betico Croes mes tabata un persona cu tabata impone, tabata tin espacio pa otronan para banda di dje.

Loke mas tabata capta atencion, tabata su envolvimiento social: e suceso di mas simple tabata capta su atencion y e tabata pidi su coleganan di partido pa dune mas informacion.

Betico Croes tabata traha tempo pa tur cos pa chikito o di poco importancia cu e por tabata parce,

Despues cu el a sufri e accidente, un vacio a keda atras, manera Bareño ta bisa. E no por a comprende pakico, pero hecho ta, cu na momentonan crucial no tabata tin hende pa yama, pa discuti asunto nan. Especialmente na cuminzamento tabata dificil, pero poco poco a bay acostumbra cu e idea cu Betico tabata ausente.

Grace Bareño tabata uno di esnan cu tabata

convenci cu Betico lo a bolbe, cu e lo a sali for di coma.

Con futuro lo ta sin

Betico? Lo mester sigui traha sin Betico. Lo mester sigui su forma di pensa, awor mas cu nunca.

Forza, Grace Bareño a desea Pueblo ante e noticia di fayecimento di Betico Croes.



Mario Odor y Betico, dia cu e Museo Numismatico a worde inaugura.



COY E BANDERA



**DAVIERNA SU
RESTONAN
MORTAL TA YEGA
ARUBA.**

Un pais ta prepara
pa despedi di e
homer cu a dune
su libertad.

Un homer cu jamas
por worde lubida.

Betico Croes, e
homer cu a kere
den Aruba Libre. E
homer cu a percura
pa Aruba por a
canta su himno y
hisa su bandera.

Betico: e nomber cu
ta simbolisa lucha di
un Pueblo.

ARUBA DUSHI TERA

Aruba patria aprecia,
nos cuna venera,
chikito y simpel bo por ta
pero si respeta.

(Coro:)

O, Aruba, dushi tera,
nos baranca tan stima
nos amor p'abo t'sina grandi
cu n'tin nada pa kibre! (bis)

Bo playanan tan admira
cu palma tur dorna,
bo escudo y bandera ta
orgullo di nos tur!

(Coro:)

Grandeza di bo pueblo ta
su gran cordialidad,
cu Dios por guia y conserva
su amor pa libertad!

(Coro:)

"Coy e bandera". Palabranan cu tabata worde expresa pa Betico Croes, na momento di problema, di emocion; na momento cu ningun hende lo por a comprende otro palabra. Pasobra e frase tabata tin su propio contenido. E tabata bisi tur loke Betico Croes tabata kier expresa y tur loke Pueblo kier a tende: Tene na e bandera, na Aruba, y sigui dilanti, semper dilanti.

Coy e bandera: palabranan cu ta describi Betico Croes, kende tabata algo mas cu un politico. Betico Croes tabata e homer, cu a sabi di hinca den su Pueblo e orguyo franco di ta Arubiano. El a puli e sentimentonan patrio cada bez cu problema, decepcion o desaroyonan menos positivo, tabata amenaza di kibra animo. Aruba tabata forza di Betico Croes y Betico Croes pa Aruba tabata representa e forza, e punto di sosten cu Pueblo tabata busca pa realiza su plan mas ambicioso: su libertad!

Coy e bandera: e palabranan cu a duna Betico Croes tambe empuje, manera lo sali dilanti ora sigui e momentonan crucial cu e mester a pasa aden. Kico a biba cerca e hende Betico Croes, ora henter un Pueblo tabata atento pa su palabranan, pa e direccion cu e mester a duna?

Pa esnan cu a conoce Betico Croes mas di acerca, ta conoci cu Betico Croes tabata busca su forza den Dios y Patria. Si, Betico Croes tabata tan convenci pa e hecho cu tin Uno mas grandi cu tur; Uno cu tabata rigi destino. Uno cu tabata dicidi. Talbez por a parce de bez en cuando cu e tabata hunga politica cu e sentimiento aki, pero en realidad, Betico Croes tabata convenci di e forza cu e como hende, mester a busca mas ariba y e no tabata tin verguenza di expresa su mes den tal direccion; di demostra cu e ta kere den Dios!

Despues a bini su Patria: Aruba. Solo por a keda sin sali e dia; nubianan scur por tabata tapa horizonte, pero na momento cu Betico a papia di Aruba, ta comosifuera e mal tempo mas pisa, mester a apacigua pa e lucha por a continua. Aruba: e interes total cu Betico Croes tabata tin pa su pais. E aspectonan di mas chikito, tin biaha insignificante den bista di otro, tabata tin su atencion.

Betico Croes tabata un Arubiano y el a keda Arubiano. Aunke politica a hibe na nivelnan alto, aunke su labornan a pone ariba plataforma internacional tanto biaha, e no a cambia su identidad como Arubiano. E tabata uno cu Pueblo: uno den su expresion, uno den su gustonan, uno den su tradicion, uno den tur loke tabata Aruba.

Aruba por a identifica su mes cu Betico Croes, e lider cu no a tranca ariba pedestal. Esey a duna Betico e confianza di Pueblo, cu a haci di un homer, su punto di union, di mara forza, e nucleo di un lucha cu tabata tin mester di un capitan pa e por a logra.

Cuanto Aruba a existi di Betico Croes? No por papia solamente di e cantidad di horanan di trabao, cu tabata tene ariba pia hopi biaha sin descanso siquier. No por papia solamente di e energia cu a worde existi pa bula di un punto pa otro, drenta reunion sali y sigui traha! No! Mester papia tambe di e responsabilidad enorme cu a worde poni ariba su loniba, cu el a acepta. E responsabilidad cu Pueblo a entregue y cu e mester a carga como simple ser humano. Betico a cargue, Betico a lucha, Betico a logra, pero lastimamente nunca a mira su logro.

Coy e bandera! Palabranan di Betico, cu a tene na e Himno, na e Bandera, na Aruba pa por a haci 1 di Januari 1986 bira realidad, sin sabi cu e lo tabata esun cu lo a duna entrada den Status Aparte un sabor amargo.

Coy e bandera! E mensaje cu Betico a laga atras. E frase cu Pueblo kier scucha y capta awe, cu nubianan di problema ta keda colga na cielo y solamente e bandera, e amor pa Aruba, ta haci Aruba sigui cana.

Coy e bandera, palabranan pa un Pueblo cu cada bez cu e mira e bandera, lo corda ariba un homer, un Arubiano, cu a entrega su pais, realizacion di su anhelo. Betico, descansa! Drumu tranquil, mientras Aruba ta trata di jamas lubida, cuanto a costa e logro cu bo a regale: su libertad!